

光緒山西通志

文學錄中

錄八之二

山西通志第二百五十五

賜進士出身頭品頂戴兵部侍郎兼都察院右副都御史巡撫山西提督軍務臣張煦舉  
旨監修

歷代 宋玉明

陶穀字秀實太原人祖唐彥謙有詩名父渙領夷州刺史唐  
季爲邠帥楊崇本所害穀隨母柳氏育邠州之新平十餘歲  
能屬文起家校書郎單州軍事判官避晉祖諱改姓陶嘗以  
書干宰相李崧崧甚重其文時和凝亦爲相同奏爲著作佐  
郎集賢校理改監察御史分司西京遷虞部員外郎知制誥  
時廢翰林學士兼掌內外制詞目繁委穀育多委愜爲當時  
最天福八年賜緋袍靴笏黑銀帶九年加倉部郎中穀性急  
率嘗爲兗帥安審信所奏坐責授太常少卿嘗上言頃淮西

臺每見臺司詳斷刑獄少有卽時決者至於閭閻夫婦小有爭訟淹滯踰時坊市死亡喪葬必俟臺司判狀奴婢病亡亦須檢驗吏因緣爲姦而邀求不已經旬不獲埋瘞望申條約以革其弊從之俄拜中書舍人請教習樂工停二舞卽及禁民伐桑棗爲薪並從其請開運三年賜金紫遼人北歸脅穀令從行殺逃匿僧舍素工厯數謂同輩曰西南五日生連珠漢地當有王者出遂歸漢爲給事中乾祐中令常參官轉對因上言曰五日上章曾非舊制乞停轉對羣臣有所聞見卽許不時詣闕門奏從之仕周爲右散騎常侍世宗卽位遷戶部侍郎從征太原爲翰林學士時命承旨徐台符以下二十餘人各撰爲君難爲臣不易論平邊策以進策率言修文德來遠人惟穀與寶儀楊昭儉王朴以封疆密邇江淮當用師

取之爲言世宗自克高平常訓兵講武及覽其策忻然聽納由是平南之意益堅顯德三年遷兵部侍郎加承旨時上留心稼穡刻木爲耕夫織婦暨女置於禁中穀進贊辭顯德六年加吏部侍郎宋初轉禮部尙書依前翰林承旨乾德二年判吏部銓兼知貢舉再爲南郊禮儀使法物制度多穀所定時鹵簿清游隊有甲騎具裝莫知其制以問穀穀上其制又大輦制久亡穀創意造之後承用焉明德門成詔爲記後累加刑部戶部二尙書開寶三年卒年六十八贈右僕射穀強記嗜學博通經史諸子佛老咸所總覽多蓄法書名畫善隸書爲人尙辨宏博而多忌好名初太祖將受禪穀於懷中出禪文太祖以是薄之子邴起居舍人天禧四年錄穀孫實試祕書省校書郎

王景純太原人少客燕以家世儒者不當用材武進乃南游嵩洛得譚用之爲友以文章相砥礪寢以文稱天會中還至境上會北漢睿宗據太原嘆曰天下將定以區區一方拒天下兵此危國也遂止上燕潞州帥延致幕府後不復作吏時時購四方書鈔之晚年集書數千卷宋端拱中終于汴

胡賓王榆次人精於書數宋初隱居不仕著劉氏興亡記

王保衡太原人仕北漢爲中書舍人直翰林院博學有文名入宋卒所著晉陽見聞要錄若干卷行世

王貽孫字象賢邠人溥子少隨周祖典商穎二州署衙內都指揮使顯德中改朝散大夫著作佐郎宋初遷金部員外郎賜紫累遷右司郎中淳化中卒溥聚書萬餘卷貽孫遍覽之多藏法書名畫太祖嘗問趙普拜禮何以男子跪而婦人否

普問禮官不能對貽孫曰古詩云長跪問故夫是婦人亦跪也唐武后朝婦人始拜而不跪普問所出對曰太和中右幽州從事張建章著渤海國記備言其事普大稱賞之端拱中右僕射李昉求郡省百官集議舊儀貽孫具以對時論許其諳練云

唐暉字子西陽曲人讀書縣北亭子山下鑿桃花三洞居之

元遺山稱其於詩爲專門宋天聖中劉海蟾過鳳凰山留題

十韻子西和之

續夷堅志有暉脫殼楸絕句一首亦詠海蟾子事也縣志作唐朝五代人

任山平晉人有大志法春秋作通記擬井田作中田圖嘗詔

言事富弼厚遇之所著有晉溪集

以上太原府

郭純洪洞人嘉祐二年進士第時士習文尙奇遊就太學體

歐陽修知貢舉痛抑之得純卷喜其高古遂中第司馬溫公

見所作亦譽之曰此良史才也可與馬班媲美矣一時韓富諸賢莫不器重之官宣德郎

平陽府

高錫字天福河中虞鄉人幼穎悟能屬文漢乾祐中舉進士王晏辟徐州掌書記又辟河南府推官周顯德初徒步詣招諫匭上書南擇賢任官分治眾職不報復疏諫翰林學士及兩省官分撰排優詞後爲蔡州防禦推官宋初棄官詣匭上疏請禁兵器不報建隆五年又以書干宰相范質質奏用爲著作佐郎明年春遷監察御史尋拜左拾遺知制誥加屯田員外郎乾德初賜緋坐事貶萊州司馬改均州別駕移陳州太平興國八年卒

蒲州府

張仲容上黨人徽宗時登科仕屯田員外郎以好士名天下

後致仕以詩名

潞安府

趙淑汾州孝義人辨博幹濟從事使府綽有能聲太宗尹開  
封授雍州太康二縣令邑中大治進安申觀察判官事皆應  
手而辦淑有文學能詩上生辰獻詩百韻爲壽上亟稱之  
劉義叟字仲更澤州晉城人歐陽修使河東薦其學術試大  
理評事權趙州軍事判官精算術兼通大衍諸曆及修唐史  
令專修律歷天文五行志尋爲編修官改祕書省著作佐郎  
母喪詔令家居編修書成擢崇文院檢討未入謝卒義叟強  
記多識尤長于星歷術數皇祐五年日食心時胡瑗鑄鐘舛  
而直聲鬱不發又陝西鑄大錢義叟曰此所謂害金再興與  
周景王同占上將感心腹之疾果驗又月入太微曰應後宮  
已而溫成薨至和元年日食正陽客星出于昴曰應在遼事  
皆驗義叟未病嘗曰吾及秋必死云著十三代史志劉氏輯



歷春秋災異諸書

李異高平人大節孫受韻子大愚公著切韻門庭行世二子長林舉進士次森年十八澤州發解第一補萊州文學靖康之亂盜賊掠境森謂其渠長曰公第取財何害但勿殺人皆

羅拜而退

以上澤州府

張紹先博綜羣書登元祐二年進士擢將作少監轉翰林承旨以文學著名

平定州

邵思雁門人撰姓解三卷於古今姓氏源流討論最備

代州

右宋十五人

又二人附見

趙達夫太原人性嗜讀書而不事科舉南渡後居緱氏山中安貧守分故終世窮悴壬辰之兵遇害

王璠字君玉太原人天眷二年進士弟珙字器玉珣字汝玉

皇統九年同榜家世業醫有陰德聞里中嘗有金蠶金馬之  
瑞琦仕至汾陽軍節度使鄉人榮之號三桂王氏仲澤其從  
孫也金馬在部椽清卿房迄今寶之

劉滋字文榮合河人六歲能賦詩與同邑劉徵太原常添壽  
皆以神童名當時徵七歲被旨賦鳳皇來儀添壽亦四歲能  
詩

劉昂字之昂興州人大定十九年進士高曾而下以科名相  
踵者七世昂天資警悟律賦自成一家作詩得晚唐體尤工  
絕句往往臉炙人口李屏山故人外傳曰之昂早得仕年三  
十三省掾考滿授平涼路轉運副使人謂卿相可坐致矣術  
士言昂官止五品昂不信也俄以母憂去職連蹇十年卜居  
洛陽有薦其才者泰和初自國子司業擢左司郎中坐與執

政賈鉉滿言除授事降上京留守判官道卒竟如術者言

郝侯字子玉太原人正隆二年進士歷鳳翔府治中充遼史刊修官仕至河東北路轉運使自號虛舟居士有集行世張汝霖嘗奏曰郝侯能屬文宦業亦佳章宗謂宰臣曰郝侯詩賦佳舊時劉迎能之李晏不及也子居簡字仲寬有詩名太原平陽間居中字仲純樞密院令史出身嘗刺坊州人物楚楚所謂文獻不足猶超人羣者也正大末除鳳翔治中南山安撫使詩亦有功

張緯文初名緯字愚齋陽曲人以文章知名當世與元好問善好問寄中書令耶律公書舉名士四十餘人緯文與焉

李汾字長源太原平晉人爲人尙氣跌宕不羈性褻躁觸之輒怒是以不爲人所容喜讀史工詩雄健有法避亂入關京

兆尹子容愛其才招致門下留二年去之涇州謁左丞張行  
信一見禮以上客元光開游大梁應舉不第用薦爲史館書  
寫殊不自聊時趙秉文爲學士雷淵李獻能皆在院刊修際  
汾在旁正襟危坐讀太史公左邱明一篇或數百言音吐洪  
暢旁若無人旣畢顧四坐漫爲一語曰看秉筆諸人積不平  
而雷李尤切齒乃以慢罵官長罷去明年上書言事不合容  
唐鄭開恆山公武仙署行尙書省講議官旣而仙與參政完  
顏思烈相異同頗謀自安懼汾言論欲除之汾覺避泌陽仙  
令總帥王德追獲之絕食而卒年未四十平生詩甚多不自  
收集傳者十二三而已

以上太原府

喬戾字君章初名逢辰洪洞人天德三年進士歷大理司直  
孟州刺史自號蓮峰真逸詩樂府皆有名字字八歲能鼓琴

召入東宮顯宗稱其不凡大定十六年登科貞祐初爲益都  
按察轉運使與田琢胥沒兵聞辰初仕爲蒲城丞值海陵南  
伐宋將任天錫以兵陷商州時關陝空虛人心驚搖蒲城令  
與尉皆遁去辰召耆老告之曰事勢若此南軍且至爾等何  
以禦之皆曰有降而已辰曰卽偏師至南軍奔潰不暇從之  
而去者死於蹂躪其不能出者責以背叛孥戮之莫如一心  
固守此萬全策也既而有翻城去附者辰執而戮之乃定

趙文昌字公權平陽人明昌二年進士仕至遼東路鹽使博  
學好持論周常山甚愛之于觀字維道從事史院資謹厚趙  
秉文許其字畫精進不已可到古人云

王琢字器之平陽人與毛牧達友善性孝友爲鄉里所稱酷  
嗜讀書往往手自鈔寫家素貧而能以剛介自持未嘗有所

丙貨時命不偶年四十五病卒士論惜之有姑汾漫士集行  
世所著聖人賦尤工

張德直字伯直平陽人叔祖邦彥登科百松堂集行世父迪  
祿明昌初進士德直貞祐三年進士釋褐新平簿藍田令  
秩滿父老詣行臺留再任去日爲立生祠終于同知武勝軍  
節度使事能詩見中州集

張宇字彥升臨汾人與同縣房暉並從元遺山南遊傳其詩  
學號石泉先生暉字希白自稱白雲子詩並見河汾諸老集  
張琚字子玉河中人父鉉字鼎臣大定中進士仕至同知定  
國節度使琚刻意於詩長五言詩人喜稱道之有張五字之  
目集號韋齋

馮賁深鄉甯人嘗從稷山二段先生遊能詩遜菴居龍門賁

深自山中訪之出舊所爲詩百餘篇遜菴言其離羣索居無師友之益能自道其所志蓋絕無而僅有者菊軒之客晉甯也亦以詩贈之有歸去莫憂餅粟罄西山雨足葳蕨多之句

殆以逸民相期也

以上平陽府

麻革字信之虞鄉人秉彝孫有先人業在王官谷革樂道不仕教授生徒以詩文自娛號貽溪子房祺言貽溪與遺山詩學無慊古文出其右當時以爲公言編河汾諸老詩以革集

冠其首

以上蒲州府

宋楫字濟川長子人年十九天德三年擢第除著作郎母老丐歸養許之泰和三年以省掾從吏部尚書梁肅使宋副趙王府長直臣獵淮上射一虎斃之楫有詩記其事語意俊拔泗州守刻石于鎮淮堂楫官至孟州防禦使子元吉明昌二

年進士元圭泰和三年進士皆有名

張溫字元佐上黨人泰和六年乙科登第詩樂府俱有名於時

董文甫字國華潞人承安中進士性樸質澹於世味於心學有所得自號無事道人子安仁亦學道父子嘗閒居寶豐閉戶不出以習靜爲業朝夕不繼晏如也文甫歷金昌府判官禮部員外郎昌武軍節度副使正大中以公事至杞縣自知死期作書與家人及同官又作詩貽杞縣令佐詩畢擲筆於地以扇障面而逝

王良臣字大用潞人承安五年進士作詩以敏捷稱又於內典有得入翰林與李欽叔善從軍南征欽叔與行道中酬唱甚多興定初自請北行沒於軍中贈孟州防禦使

以上部安府



吳永石州人舉進士少好學廣蓄書籍構萬卷堂置書其中  
家世誦讀子孫多顯

吳希尹永子少力學知名當世大定間登進士第官至同知  
陝西東路轉運使子章亦舉進士仕至翰林學士元遺山嘗  
受學焉

馬天來字雲章人稱元章介休人黃裳榜經義進士博學多  
技能盡入神品百年來無出其右李屏山常言天下辯士有  
三王仲澤馬元章純甫其一也天來佳太學十九年貧苦人  
不能堪而談笑自若大安初調潁州司候靈壁簿召爲國史  
院編修官正大九年卒年六十一劉紹先贈詩云波瀾口頰  
談元駛土木形骸與世違曠昔麻鞋見天子只今道服勝朝  
衣蓋實錄也元章多作詩欲別出盧仝馬異之外又多用俳

體作譏刺語云

李晉字子益鄉貢進士善文詞自號西源老人亦稱西源散

人

以上汾州府

晁會字公錫高平人宋文元公迺之後宣和末中武舉爲太子洗馬天眷二年經義進士爲人美風儀氣量宏博澤人自靖康後生徒解散會誘進之貧不能就舉者必厚爲津逮在官輒分俸給之李承旨致美昆弟皆出其門士論歸焉厯虞鄉猗氏臨晉三縣令以興平軍節度副使致仕年七十八卒詩號泣水集孫國章字公遠李承旨外孫教授鄉里諸生經指授者肅然如在官府進退拱揖皆可觀蓋其家法云

趙可字獻之高平人貞元二年進士仕至翰林直學士博學高才卓犖不羈在翰林時詔誥多出其手流輩服其典雅歌

詩樂府尤工號玉峯散人集子述承安二年登科詩章字畫皆有父風

盧洵字仁甫高平人有詩學李晏見所作上梁文器之勉使就舉年六十一登科歷河南教授宜陽令有政績詩文推重於時

劉昂霄字景元別字秀房陵川人父俞明昌進士昂霄讀廣記半月能背誦元好問戲取市人曰歷鱗雜米鹽者令讀之一過目無脫遺大率昂霄之學無所不闕六經百氏外世譜官制與兵家所以成敗者爲最詳爲人細瘦似不能勝衣好橫策兀坐掉頭吟諷幅巾奮袖談辭如雲四座聳聽際不得語故評者謂王湯臣論人物李之純元談號稱獨步昂霄則兼眾人之所獨愈叩而愈無窮不知去古談士爲遠近餘人

不論也嘗用門資敘調慶陽軍器庫使不就諸公方薦試宏辭已病卒臨終夢賦山泉云帶雲縈遠澗和月到疎林又云萬里馮唐老中年賈傅歸未幾下世年三十七

蔡畧字簡夫陵川人父專軻有詩文工作大字簡夫少舉進士不中卽以詩爲業詩尙雕刻而不欲見斧鑿痕有自得之趣年六十七卒臨終留詩云軀殼羈棲宅兒孫邂逅思雲山最佳處隨意著詩魂自號西溪老人有集行世

陳載高平人力學安貧日誦數千言明昌間舉經義進士第  
一人

申萬全字伯勝高平人與兄無移伯福俱擢第爲人沈重不妄交好經學嘗爲鄭縣令愛民愼獄不爲赫譽民便之後召入史館攝監察御史應奉翰林居京師朝歸閉門講誦不出

觀時事不愜意屢欲以母老歸未果正大末爲南伐行臺辟  
掌書檄至淮上大雨宵行溺水死士論惜之趙秉文爲文以  
祭哀甚初萬全在大學與雷淵劉益同舍相善益嘗稱其爲  
人工詩知名文亦典雅有體

郝天祐陵川人兄弟三人俱治經篤學天祐更知名

趙文昌字當時陵川人仕至京兆轉運副使工詩

李俊民字永章澤州人唐韓王元嘉之後也少通程氏之學  
承安五年以經義舉進士第一應奉翰林文字未幾棄官教  
授南遷後隱於嵩山元世祖在藩邸劉秉忠盛稱之以安車  
召見延訪無虛日遽乞還山賜號莊靖先生世祖嘗曰朕求  
賢三十年惟得竇渙卿及李俊民二人卒於家澤守段直刻  
其遺集十卷長平李仲紳王特升序之謂其真搜隱索片言

隻字亦必有據劉滙言其詩清新奇傑似東坡山谷雄篇鉅章奔騰放逸昌黎之亞其爲當時推重若此

以上澤州府

劉搆渾源人舉進士仕至石州刺史自號南山翁著賦爲時楷範子汲亦舉進士爲翰林供奉自號西巖老人有文集

雷思字西仲渾源人天德三年進士大定中任大理司直持法寬平仕至同知北京轉運使有易解行世號學易先生弟志字尙仲亦第進士仕至永定軍節度使思季子淵

張穢字巨濟先世泰州長春人有官山陰者遂占籍焉曾祖頤宗銀青榮祿大夫祖惠懷遠大將軍父天白號縣簿穢明昌五年詞賦第一仕至鎮戎州刺史爲人有蘊籍善談論文賦詩筆傲然有律度時人甚愛重之中州集稱張內翰云宗道字雲叟山陰人以足疾不仕有詩云家藏千卷富身得

一生閒茅屋經年補柴門盡日關其自處可見

劉勳字少直雲中人徙居濟南少日住太學有聲場屋間南渡後專於詩學往往爲人所傳其先世本衣冠家風流蘊藉都無科舉氣見於文字者亦然工詩長尺牘落筆皆可觀樂府如暮鴉庭院春陰淡句尤可喜

曹之謙字益甫應州人幼力學興定中登第與元好問同掾東曹機務倥傯商訂文字未嘗少輟北渡後居平陽者三十年與諸生講學一以伊洛爲宗眾翕然從之所著古文雜詩三百首曰兌齋文集汲郡王惲序之稱其析理知言渾涵經旨刊落陳言云

以上大府

趙岐遼州人明昌五年爲襄垣令威惠並施吏民懷畏工詩爲時所重

邢安國字仲祥沁州武鄉人少日有賦聲後以詩酒自娛不復應科舉避亂客沁陽備極艱苦年餘始北歸

邵知章平定人家世業儒有詩名與司業王嗣能齊名

楊著平定人爲本州教授金亡聶侯招延之以教鄉里子弟守節不仕自號嘉山逸人

以上遼沁平三州

孫九鼎字國鎮忻州定襄人天會六年經義第一在太學時遊金明作絕句一時傳誦弟九疇億胥有名三人同榜吳彥高贈九鼎詩云孫郎有重名談笑取公卿清廟瑟三歎齊房芝九莖其爲名流稱道如此忻州文派九鼎指授功爲多年八十餘卒

元德明字東巖秀容人唐禮部侍郎結之後幼讀書鄙事不挂口誠實樂易洞見肺腑布衣蔬食家人不敢以生理累之



僮奴竊拾東家棗立督令還人負債往往折券累舉不第放  
浪山水間終於家工詩有集三卷

趙元字宜之定襄人經童出身調鞏西簿未幾失明自少博  
通書傳作詩有規矩泰和後有詩名河東李屏山爲賦愚軒  
有落筆突兀無黃初之句愚軒元自號也用是名益重南渡  
後往來洛西山中趙開閭雷御史王子文許至忠崔懷祖皆  
愛之所至必虛左以待爲人有才幹處事詳雅旣病廢無所  
營爲萬慮一歸於詩故詩益工若其五言平淡處機趣渾若  
天成他人未易造也元遺山稱張參政澄嘗從趙宜之學故  
詩文皆有律度其見推許如此

王萬鍾字元卿秀容人父甫見隱逸兄萬石字器玉住太學  
有賦聲萬鍾少有逸才讀書有後先不欲速詩文間適似其

爲人客至清談終日人不敢以俗事浼之與同郡田德秀齊名號土田評者謂規製宏博王不及田而蕭酒無塵土氣田亦非王比也古詩尤蕭散有自得趣兵燹中皆亡失貞祐二年與萬石居平晉金城里明年兵復至萬石被害萬鍾欲收葬之時游騎充斥親舊勸勿往萬鍾流涕而去尋被禍年二十七人甚哀之

元好古字敏之秀容人好問兄性謙穎悟讀書能強記務爲無所不窺以狷介得疾沒於北兵之禍年三十一詩見中州

集

以上忻州

劉復字克明代州人爲國子祭酒以文章知名當世時稱雪溪先生卒謚文靖子仲脩亦能文元好問稱其詩律深密得於過庭之訓顏狀絕類李汾云

楊慥字叔玉五臺人承安五年進士歷州縣入爲尙書省令  
史拜監察御史侍御史京西大司農丞京南司農卿戶部侍  
郎擢尙書自入戶曹卽有相望資雅重事無巨細處之皆有  
法至於知朝廷大體則又非他人所能及也汴城受兵權參  
知政事明年卒於河平元好問言叔玉文工於詩而人不以  
能文稱特未見其文耳

王特起字正之崞縣人智識精深好學善論議音樂技藝無  
所不能長於辭賦出入經史摘其英華以爲句讀如天造神  
出在張大節門下與李屏山爲忘年友泰和三年進士甲科  
調眞定府錄事參軍有惠政民立碑頌其遺愛改合沁源又  
遷司竹監使朝議欲以館職召試會卒起開開嘗屢哦特起  
華山詩以爲妙絕云

武伯英，崞縣人，少舉進士，以詩名。嘗賦剪燭，刀有啼殘，瘦玉蘭心吐，蹴落春紅，燕尾香之句。仕觀州，倅喜貯書有萬卷樓。爲人多伎巧，山水雜畫，斲琴和墨，皆極其工。

趙秦，字伯通，代州人。少力學，擢第禮學。好士，有先達風。

許蛻，字子遷，雁門人。以武皇廟詩著名。有集傳河東倪民望。字具瞻，李屏山所謂倪侯頭如筆，其鋒不可當者也。又張韶九成寄湖州荀輔臣云：陳雷膠漆輕，餘子楚漢風。雲屬少年李忠直，卿賦雲云，不將柳絮春風比。好作梨花月夜看。又蘇吉莘老李鵬翼，冲霄與具瞻之子仲儀詩文亦多可傳。

王敏夫，五臺人，作詩工賦物，爲趙宜之所稱。

以上代州

白君舉，字白賈，一字寓齋，隰州人。登泰和三年詞賦第。官岐山。

令廣覽強記，尤精於左氏。至禪學道書，岐黃之說，無不精詣。

詩名與元遺山相頡頏元白爲中州世契兩家子弟每舉長慶故事以詩文相往來北渡後卜築於漳陽結茅爲亭有茅亭詩樂城李治序之曰龍韜雷厲於紛拏之頃玉唾珠流於談笑之間吳澄曰巧妙禮麗錯諸吳楚謠歌中幾莫可辨弟華字文舉亦登貞祐三年進士第官樞密院判子樸字仁甫號蘭谷有天籟集詞

保定州

南濤安邑人大定初貢士長於文學一時碑志多出其手劉制文學與南濤齊名工書

劉祖謙字光甫安邑人承安五年進士歷州縣有政蹟拜監察御史以鯁直稱其不能俯仰世好蓋天性然也正大初召爲翰林修撰家多藏書金石遺文略備以鑒裁自名主於信筆作簡牘尤有可觀一時名士如雷淵李獻能王渥輩皆遊

其門得人一詩可傳必殷勤稱道唯恐不聞人以是稱之遭  
亂北遷爲兵士所殺

關漢卿解州人工樂府著北曲六十本文致曰關漢卿如瓊

筵醉客

以上解州

陳規字正叔稷山人明昌五年進士博學能文詩亦有律度  
爲人敦厚動有禮節南渡後諫官稱許古陳規不以訐直自  
名尤見重云仕至右司諫卒

孫鎮字安常絳州人高才博學嘗中省試魁承安二年五赴  
廷試湯第以陝令致仕年八十四卒有注東坡樂府歷代登  
科記行世弟甯州刺史錡字安世潘原令鉉字安道同榜擢  
第鄉人榮之號三桂孫氏

宗經稷山人省試領解尋舉進士所著有雲巖文集

段鈞字平仲稷山人矩子以文行著聞其弟鐸師事之同遊  
場屋有聲都人稱爲河東二段名其居曰雙桂里早卒

段克己字復之河東稷山人恒子與弟成己並以才名禮部  
尙書趙秉文目曰二妙大書雙飛二字名其里金未以進士  
貢北渡後與成己避地龍門山二十年而卒人稱遜菴先生  
孫輔吏部侍郎刻二妙集於家塾吳澄序河東二段先生心  
廣而識超氣盛而才雄其詩蓋陶杜兼而有之者也

段成己字誠之克己仲弟登正大進士第授宜陽主簿克己  
沒後自龍門山徙晉甯北郭閉門讀書元世祖降聖書卽其  
家起爲平陽儒學提舉不赴年過八十優游以終世稱菊軒  
先生祭酒周文懿評其文在班馬之間河汾遺老之卓然一

門未有如段氏者

以上  
絳州

張著字仲揚永安人泰和五年以詩名召見應制稱旨特恩授監御府書畫

王綱字振之趙城人金章宗時廷試詩賦賜狀元及第官翰林院修撰撰忠孝歌行于世以上霍州

邊元勳豐州人父貫道遼時舉進士第一元勳與弟元恕元鼎胥有名號三邊登天會十年進士終河間路轉運使元恕十歲能詩天德三年第進士以事停銓世宗初太師張浩表薦供奉翰林出爲邢州幕官復坐誣累不復仕元鼎資稟疎俊詩文有高意時輩少及歸化城廳

右金六十七人又三十四人附見

李謙字進之太谷人元好問寄耶律公書稱之爲人嶽峙厯落安貧志學名所居曰迂軒後爲眞定教官大修廟學好問



爲之記世祖嘗命張德輝舉才堪任風憲者德輝以謙應  
張欽榆次人登進士第歷太原路儒學教授博洽善屬文有  
韓柳風士類多宗慕之

郝忠恕交城人佑之子官翰林侍制獻所著無逸圖帝悅命  
總裁宋遵金三史書成歸隱終身學官卦山有篆書碑文  
聶天章交城人奎元間舉進士工于文辭有修行授朝列大  
夫後左遷趙城尹因辭歸不出

胡巨源榆次人登進士第任高麗軍民總管儒學教授博學  
多著述有文稱子惟堯鄉貢仕晉甯路學正寬裕不事邊幅  
士子樂與之游博雅出巨源右

杜質榆次人性嚴重博學有雅量一吟一詠胥包括道義激  
勸風化人士雅重之歷翰林院編修江北燕南兩道廉訪司

經歷江南諸道監察御史

程邦彥祁縣人工詩賦善草隸時稱三絕歷官汾州同知上

太原府

王泰字和川人成宗時給事東宮歷太子賓客累遷中書平章致仕封晉國公謚清憲所著有康莊文集

房祺臨汾人爲河中大同兩路教授終潞州判官著有橫汾集子希文泰定甲子解元著有淵雲集

劉尙賈曲沃人泰定進士任稷山尹遷翰林編修拜內臺御史忠直敢言克舉其職與學士靳榮同時胥負文名懸車後相與偕往太平館中飲酒賦詩當時豔稱之

靳柱字天石襄陵人善屬文有韓柳體登至正丙午進士第初授正平尹尋拜監察御史

王士元平陽人舉進士歷官國子司業以崇文少監致仕持身廉正文行政事皆可師法所著有拙菴集

單鶴臨汾人仕至四川行省郎中著有河汾集

楊統字洪崖洪洞人讀書自樂不求聞達與張雲谷友善以詩文見稱於時

王通臨汾人隱居安邑博通經史精於易春秋累辟不就述東周四王年譜行於世卒年七十四葬條陰之阜

以上平陽府

陳廣字子颺別號默軒臨晉人仲謙長子擢明經累官河東山西道行中書省參議有才名與弟廣俱徙太原元好問游詩文數相贈遺官大同路儒學教授房祺纂錄其詩自麻革張宇房暉段克己成己曹之謙及庶兄弟八人曰河汾諸老詩集庚字子京與兄齊名除平陽路提舉詩見集內弟廣亦

有文名膺官東平路勸農使追封潁川侯謚莊敬

敬鉉河東人與太原元好問同登金進士第元初爲中都提學著春秋簡忘四十卷仁宗朝命刻其書令行於世

裴居敬蒲州人累官雲南行省參政積學勵行家蓄書至二萬餘卷

郭思貞河中人以儒業進拜監察御史累遷南臺治書西臺中丞奎章閣大學士謚文獻以上蒲州府

張習義垣人至元年間鄉舉授沂州同知高才絕學以文章名世

連葵字士微淹經史通雜略辭翰自成一家中河東鄉進士授河南儒學提舉不受卒贈集賢直學士朝列大夫

王天祐上黨人天資穎悟有偉才累官太常博士謚大禮多

見俞允皇慶間以潞州知州進階奉議大夫子璋琮璜玳俱

有名

杜汝楫潞城人文章德行一時推重與同邑高不器齊名不

器後登上第見李賢碑記中

以上潞安府

張益西河人泰定初進士廷試第一歷監察御史國子監司

業至順中中書欽察官以罪罷復起爲四川平章益在臺諫

極言其反覆不忠狀詔奪官同妻子永錮廣東仍諭御史凡

檢人如欽察官者並極言之益性謹厚嘗受學於王祺儒者

也故其持身雅有法度子大猷亦舉進士益有句云乳燕引

雛歸鳳閣遊魚銜子過龍門其他詩文皆無傳

汾州府

李純高平人父仲紳金奉正大夫純幼習父業常帶經而鋤

中統庚申詣京執政者嘉其雄辯授中書遷臨漳府

澤州府

劉祁字京叔渾源人金應奉翰林益子也少穎異爲學能自刻苦有奇童目弱冠舉進士應試失意卽閉戶讀書務窮遠大一放意於古文李屏山趙閑閑楊吏部雷御史王溥南見之曰異才也交口騰譽之從父居陳相與講明六經直探聖賢心學推以躬行踐履振華落實文章議論粹然一出於正士論咸謂得斯文正脈之傳壬辰北還鄉里躬耕自給築室榜曰歸潛堂歲戊戌召試儒人祁就試魁西京選充山西東路考試官後征南行臺粘合聞其名邀至相下待以賓友凡七年而沒年四十八有神川魁士集二十卷處言歸潛志行世弟郁字文季與兄齊名著有西使集

曹楨字幹臣應州金城人始冠上詩於耶律文正公文正稱其文采可觀爲和原韻其自燕赴和林也元遺山亦贈以詩

李微字子微雲中人元好問上中書令耶律楚材書所舉名  
士嘗及之耶律著湛然集微爲序之又有題劉祁歸潛堂詩  
吳明志大同人號樂齋累官國子助教文學重於一時嘗獻  
定本萬言策行於世

許子遜大同人授中奉大夫集賢學士有才識通經習古凡  
詔誥必更其手文章振卓於時

李巖大同人初業儒溥於仕進博覽經史旁通書算之學爲  
和甯路學正棄歸日以著述爲事嘗採衆說釋朱晦菴集註  
名曰經筵講彙凡四十九卷具表上進以上大  
同府

李淵馬邑人父完金詞賦進士累官南京路按察使長於吏  
治完爲文喜新奇至甯時擢第官翰林修撰嘗爲御史巡河  
南豪猾望風遁去後歸元以文章稱

李膺完孫生七歲而孤事母以孝聞太宗時詔郡國設科選士凡占儒籍者復其家膺甫弱冠與其選愈自砥礪遂以文學稱薦爲翰林修撰同知制誥兼國史院編修徵拜集賢學士卒謚文穆子肇順總管府判官孫豫穰縣尹

董朴朔州人初仕爲陝西道按察司檢法太史院主事皆不就集賢院奏其賢除授翰林院修撰承務郎同知制誥兼國

史院編修官致仕稱爲龍岡先生

以上朔平府

任斗南武鄉人貢生少負文名邑中碑銘多出其手子原明

初舉人歷官吏部右侍郎

沁州

顧彥逢平定人博覽羣經長於諷詠兄彥恭爲詹事校書郎彥逢與齊名世號二顧

楊恕樂平人雲翼子元好問上耶律公書同賈廷揚薦後官



翰林院待制

山西通志卷一百五十五 文苑

二十一

王構字嗣能平定人無咎子少遊李治楊恕之門舉孝廉授甯夏路教授歷翰林編修吏部主事改甯晉尹權尉司事有盜問構名以賊歸主曰不可累賢宰遂化爲善遷監察御史辭改國子監丞進司業與祭酒許衡同定學規又出同知衢州路總管府事時江南初附構一意接引翕然向化卒於官初居父母喪廬墓六年兩致白兔繞墳之異著秦溪集行於世

以上平定州

趙維賢崞縣人博學能文由國子生授孔顏孟三氏學教授平遙尹終太常禮儀院奉禮郎著有春秋集傳秋江文集諸書

代州

劉好謙解州人與稷山張德直太原元好問華陰薛微之講

賈古學且以淑人見程鉅夫薛微之碑

段思誠字仲明稷山人克己子詩文健雅大德間國史院承旨閻文公訪河東文獻與西溪並薦於朝授河東儒學教授謝去

段思溫字叔恭思誠弟少孤從仲父成已學遂成名儒貫通經史尤達易春秋詩文純正皇子安西王辟爲記室參軍不赴廉靜寡欲授業鄉里多所造就積書萬卷以遺子孫卒之日遠近赴弔市爲之罷

以上絳州

曹松年字壽之隰州人父元居鄉有行義松年與元好間遊又從宗人曹之謙於平陽得交河汾諸老故以文學知名張德輝舉才任風憲者二十人松年及渾源劉郁與焉

隰州

孟攀鱗字駕之雲內人幼日誦萬言能綴文時號育童金正

大七年進士仕至招討使北歸居平陽陝西帥府辟詳議官  
遂家長安中統初授翰林待制同修國史條陳數十事大抵  
勸上以郊天地祀太廟制禮樂建學校行科舉擇守令以字  
民儲米粟以贖軍省無名之賦罷不急之役百司統於六部  
紀綱悉由中書爲久安長治計世祖悉嘉納之嘗與論王  
許衡優劣對曰百一文華之士可置翰苑仲平明經傳道足  
爲後學矜式帝深然其言又詔問宗廟郊祀儀制悉據經典  
以對時帝將親祀命同太常定禮儀乃夜畫郊祀及宗廟圖  
以進帝皆親覽焉俄以病請西歸令參議陝西五路四川行  
中書省事卒封平原郡公諡文定

薩拉齊應

右元四十四人

又五人附見

楊一奇交城人嘉靖癸未進士河南嵩縣知縣執法除暴吏

畏民懷升鄜州知州未赴著有太極圖說略義學史談易經  
四書讀書錄補讀書記見自笑錄體物韻語行於世

潘高字子抑太原人嘉靖壬辰進士以翰林編修建言忤旨  
罷官李伯華嘗作九子詩所詠當世負奇之士於高云身廢  
談邊務家貧賣寶刀可想見其豪矣高爲王恭襄女夫能傳  
其學工詩著有春谷集

閻樸字文甫榆次人教諭大綸子嘉靖壬辰進士選翰林院  
庶吉士元輔李文康極器重之以檢討充經筵講官晉左春  
坊左贊善告歸值寇犯縣城與有司協力固守起補原官兼  
署左右春坊尚經局印陝西守臣請復河套下九卿會議樸  
亢聲曰謀事貴有成算今海內困敝兵食兩虛深入窮荒儻  
有蹉跌爲害匪細議上得允遷南京國子監祭酒進六館諸

生嚴試之如鎖闈例且曰儒者立志當以聖賢爲準聖賢一誠其本五倫其實六德六行六藝其目也閱五旬忽有旨以赴任違限勒令開住歸築小園結茅屋數椽列琴尊圖書其中著有通鑑逸旨榆次志山西通志稿諸書

王道行字明甫陽曲人嘉靖庚戌進士初授鄧州知州遷大名同知轉蘇州知府正直廉介所至吏畏民懷歷應天副使陝西參政河南按察使四川布政使以耿介忤當路歸杜門著書有桂子園集行於世王世貞常品當代詩人爲續五子道行與焉

朱表杪字竹溪晉宗榮靖王曾孫醇謹好讀書日取秦漢典籍朝夕誦問爲詩賦皆精工出人意表雅喜臨池明窗淨几臨摹古人墨蹟尤善草書以右軍大令爲宗能得其筆意

子知菴束髮習聲律年甫壯學成嘗選奇玉柱峰藐射姑山  
所至雄詞麗句與烟嵐相映發士大夫稱之

以上大原府

張昌字思廣臨汾人元時登進士第以世亂不就顯職爲晉  
山書院長洪武初聘至禮部考究禮儀得大體太祖深嘉之  
除國子監助教授皇太子經尋致仕歸昌學博才高三主本  
省鄉試創府志顯微闡幽簡質有法

宋拯洪洞人永樂甲申進士授戶部主事出爲梧州府同知  
趙府左長史擢江西提學僉事振作士類一時人文蔚興作  
詩文甚富有集行世

周麟臨汾人永樂乙酉領解幼嗜學博通經子入監送祕閣  
纂修永樂大典授清豐教諭造士有方遷肅府教授輔成王  
德與方伯后執中講論理學有河汾益友之稱一時搢紳出

其門者甚衆有詩文遺稿

梁綸字文音曲沃人正德癸酉舉於鄉授隆慶知州勤勞廉介別蠹愛民歷七載如一日乞歸百姓如失慈父母擁輿牽留橋爲之圯立生祠祀之家居足不近公庭與邑賢士大夫爲真率會以齒德重賓筵嘉靖壬辰饑盡出俸餘賑之多識奇字諧聲韻著稽古叶聲三卷年八十一卒

李鎖字仲南曲沃人莊簡公浩子也自少坐臥一樓數年不履戶外常曰不讀萬卷書作文皆兒女子氣莊簡以平逆藩功將蔭之力辭讓其弟卜居景明山莊鑿白石洞優游其中以詩文自適修撰呂柟爲撰白石樓記著有白石山人集劉鈿翼城人剛毅正直不爲習俗所移好讀書博聞強識尤深於易早夜鑽研講授不怠翼人之傳易學自鈿始也以貢

授洧川訓導洧川士素不嫻子史於經義甚疏細親爲講解  
多所發明職滿告歸祀洧川名宦子志字甯卿傳其學由嘉  
靖丙戌進士累官陝西參議疏請歸養文行爲一時所欽  
因陽臨汾人嘉靖庚戌進士性豪宕不羈不以仕進爲意官  
中書科中書解組歸窮年學古博極羣書著有經世心鑑晉  
詩選雅等集行於世

李廷實曲沃人嘉靖乙酉舉於鄉性高潔清貧自守不一履  
長吏庭知清苑縣地衝民疲拊循盡力會世廟幸承天往返  
供億多方調劑上下賴之厯淮鳳二府通判景州知州調耀  
州終榮府左長史所至咸有聲績喜讀書籤皮最富履仕籍  
三十年手未嘗釋卷經經緯史雅有次第著有曲沃志先民  
事跡錄毅軒詩文牧民懿矩兵機要略諸書子日煦隆慶丁



卯舉人掖縣知縣平賦賑饑太宰趙吉亨極嘆獎之遷大名府同知亦能聚書成父志

李宏道襄陵人萬歷丁丑進士授南陽知縣調羅山民祠祀之擢兵科給事中直言忤時出爲潁州僉事掛冠六年起爲陝西巡道轉參議引疾歸里以御史林時疏薦卽家資白金二十兩優異之起潁州兵備因治水與總河見左改關南道萬九月初復告歸性好學湛深經術所著有遵道議易補傳春秋周禮解等書

呂乾健字天常曲沃人萬歷丁丑進士授商邱知縣勞來撫循興利除害招流民三百餘戶開荒田數百頃升戶部主事監兌館陶詳出納杜侵源綜理周密軍民騰歡立石頌德後轉餉雲中事竣歸省卒所著有理學源流奉使漫稿等書

左立功字性餘洪洞人萬曆甲午舉人父世嘉諸生秉性樸實著庭訓錄以教子立功貨奉其訓由三原教諭累遷洋縣知縣同知永平府所至以清廉聞政事之暇晤對詩書著瓊罪玉屑爲居官居家規箴弟立德諸生奉父兄教端謹自飭

著  
新  
三  
語  
錄  
中

閻重光字紹南曲沃人萬曆中貢文學爲後進所宗從遊者甚衆與修山西通志及曲沃志皆稱史才嘗從中州徐某問學後徐沒家貧重光冒暑赴洛禮葬之官鄆陵訓導訓士有方多所造就兩院交章舉薦卒於官

邢大道字性之洪洞人御史質子生而穎異有奇姿稍長取父所積先秦兩漢書悉讀之爲諸生文名藉甚顧數奇不遇遂罷舉業築舍澗河之南集同志吟眺山水從事著述李廉

訪本甯深爲歎賞萬厯己酉與范明經耀昆同應聘修山西通志博採淹貫旣成歸杜戶不出所著白雲集集二十四卷行於世

王標字爾瞻太平人性淡泊寡營闢墅一區繙書種藥坐臥其中者三十年著牖下十書等集

范宏嗣字耀昆洪洞人崇禎間以貢生授德州州判遷湖廣都司經歷致仕歸未幾復保舉典所司列名上請詔令赴部疏辭不赴宏嗣淹貴經籍學有根柢從之遊者如張鵬起申嘉言皆爲時名臣及判德州卻漕儲例費漕卒咸額手白蔣令誤謫之寃嘗入都適京城戒嚴上防禦四策當萬厯中築修山西通志卽以諸生與考訂罷官後與辛全桑拱陽輩講心性之學閉戶著述有毛詩補亡諸書行於世

郭新字開士洪洞人性聰穎丰采峻整好學工詩古文侈然  
有進轍當世之志督學袁臨侯極賞之嘗云吾文得九子而  
傳吾名得九子而重九子者新自號也其傾倒若此從學三  
立書院一時名宿如傅青主王式子孟貞仲輩咸推爲祭酒  
遊江南歸交益廣詩文益富未幾卒年四十六所著有渡江  
吟曠林草其友晉露盤吳起玉爲刻之

以上平陽府

王佐字彥舉其先河東人元末侍父官南雄經亂不能歸遂  
占籍南海與順德孫蕡結詩社何真使掌書記參謀議與蕡  
及趙介李德黃哲並受禮遇稱五先生遣說肇慶李質修好  
不絕還言士多歸質真乃遣使招致士以一藝名者皆館穀  
之真歸明佐亦還里洪武六年被薦徵爲給事中太祖賜朱  
濂黃馬復爲歌命侍臣屬和佐立成性不樂樞要將告歸或

山西通志卷一百五十五 才學金石  
三  
尼之遲徊二年卒乞骸歸

王瑛字玉潤猗氏人性聰穎七歲能文年十八舉永樂甲午鄉試旋成進士授庶吉士賜歸完婚三山林誌爲文以送之卒年二十有四嘉靖中何中丞東序議舉瑛與孫達王璽合祀鄉賢

謝琚蒲州人永樂癸卯舉人授西安府學訓導歷南北國子學正遷河南道監察御史疏言修德弭災十事多見施行著有修治繩墨禮法言月川年譜太極圖說酒誥刑誥等書楊瑩蒲州人天順庚辰進士授行人冊封蜀王餽千金不受後爲四川參議致仕王復贈以金仍卻之家居貧甚州守饋之粟亦拒弗納志節堅苦終始不渝文學德業爲人稱仰纂州志稱爲核詳有體

張邦教蒲州人正德丁丑進士累官陝西按察使居官清儉  
執法不撓著有四書尚書并觀錄

令狐鏞字仲平猗氏人幼工文從御史孫月巖受尚書旁通  
易理往來河汾河東書院與蒲坂王宗雅楊俊民稷山梁承  
齋爲文章四友嘉靖乙卯舉於鄉爲碓山教諭歷朝邑知縣  
合州知州並有政績性至孝母楊病疽鏞調理無少怠躬視  
湯藥更年母愈人謂孝感著性理纂要五經巾箱大學衍義  
日鈔藏於家刊家禮集要保生心鑑行於世子一槐與鏞同  
科任浙江副使居官清慎喜愠不形處鄉不立崖異人方之  
黃叔度焉

孫承恩蒲州人嘉靖丁未進士官監察御史有詩名見列朝  
詩集

何東序字肖山猗氏人知州尚德子生而傑特年踰冠舉嘉靖癸丑進士官戶曹榷關臨清以廉潔著遷郎中督餉遼陽疏糾總兵楊照忤旨回籍起補刑曹出守徽州親統將士勦礦賊創發祁黠績四城徽人歌保障焉尋爲工科超格所劾有詔赴京聽勘御史宋繡上疏白其事移守衢州復創江開二城爲吳越根本遷易州兵備副使值駕大閱以詩上因擢榆林巡撫率師出紅山寨以大捷聞特升副都御史丁內艱遂徒步歸廬墓三年先是備兵易州時華亭與新鄭有郝華亭在告東序特疏留之因與新鄭忤至是憂歸遂不復出家居幾四十年著易知兵書論守禦方略詩文俱成一家言有九思山房集書法工鍾王體卒後直指聞於朝賜祭葬有加郭希湯猗氏人少孤力學著有四書目錄性理三書一覽律

呂問等書任汝亮何東鳳胥出其門

楊世芳字穆園蒲州人襲毅公博曾孫也萬曆己未進士選庶吉士游歷少詹事兼學士少聰穎讀書十行俱下操筆爲文千萬言立就其他琴書讀藝並臻其妙持身復嚴重循禮法當魏璫用事欲招致之不可徑請告去璫恚甚矯旨奪其官莊烈帝嗣位璫伏誅詔以原官起用乙丑辛未兩與分校所拔華其芳張溥諸人皆宿名士未幾復請告歸卒

張應徵字亭一猗氏人萬曆甲午鄉試第一明年成進士授三原知縣有政聲擢兵部職方主事歷郎中清介矜嚴無敢干以私者出爲大名兵備副使尋遷遼監軍道未任卒應徵篤學嗜古積書至萬卷悉加丹墨至閱人文字決其心術窮通壽夭無不奇中



孟時芳字斯盛蒲州人萬曆戊戌進士選庶吉士掌院劉文莊曾文恪胥器重之由編修分校丁未會試擢國子監司業以御史辱國子生東宮不親講席皇太孫未出關抗疏力爭時稱得體遷諭德掌南院印購遺書數萬卷資諸生講習入爲詹事府詹事侍講筵儀容嚴重議論剴切光宗嘆息稱善遷南吏部右侍郎轉禮部充實錄總裁官晉尙書值魏璫用事決計請告致往法崇禎初特詔起以病辭弗至著有碧山堂草叢篠園集諸書

陳國柱字頤銘猗氏人甘貧力學舉萬曆癸卯鄉試官高平教諭勤於課士彙奮於學升延長知縣居官如在鄉時退食卽展卷年方強仕致政歸勤講學寡交游所著有四書易經道學傳錄行於世子孫多以科第顯

郭廷佐字良輔蒲州人少好學博通經籍尤耽吟詠摺紳結社賦詩成奉爲尊宿郡守馮少墟聞其賢延以賓禮三請而後至馮贈詩曰鶴髮瀟瀟倒角巾林宗雅望絕時倫我來空負溪山約不向倦舟訪隱淪

王鳳猗氏人席貴嗜學不欲與庸俗伍著詩經便韻萬竹園集

張璞字荆山猗氏人天啟間拔貢爲諸生時受知於督學文太青嘗著草廬詩尙書王鐸擊節賞之贈句有云應藏知己淚莫向衆人學初任遼陽通判管監紀事經略洪承疇求草露布璞應曰通判能之卽爲文數千言經略嘆曰通判乃有大才巡撫方一漢及邊將咸重之遷陝州知州未幾致仕環堵敝廬粗衣糲食未嘗過陶白之門著書十卷

以上蒲州府

郭紳字子翔壺關人洪武庚戌舉於鄉明年成進士以一甲  
二名及第官吏部考功主事紳博學治春秋有名每與友人  
賈敏李約談論輒以第一人自許廷試傳臚果第一高皇帝  
在燭影下見其貌頗寢因以吳伯宗易之而紳寘第二紳與  
伯宗等相唱和有句曰鳳凰城闕紫霄間歷數丕承王氣還  
敏與約亦同登辛亥進士

申甫字維嶽壺關人髫年力學以文名既冠負笈遊秦中漸  
濟師友所造益深洪武庚戌開科以易魁於鄉官潞州學正  
築麗澤齋與諸生講習四輔杜敦爲之記後遷蕪湖知縣甫  
與敦同學友也敦應召入都甫賦南坡太行路清時三詩送  
之反覆規切深得古人贈別之義

李濬襄垣人永樂壬辰進士授兵部主事擢保定知府尋調

河間所至有善政致仕歸以詩酒自適所著有雲谿稿滬海  
集

王廷相字子衡潞州人少隨父客儀封遂舉宏治乙卯河南  
鄉試壬戌成進士入翰林累官兵部尚書加太子太保諡肅  
敏廷相敏歷中外銳意詩文所在宏獎風流士論歸之鄭善  
夫素未識嘗有句云海內論詩王子衡春風坐徧魯諸生善  
夫沒廷相始見其詩爲賦少谷子歌焚其藁望闕再拜其敦  
於氣誼若此生平於學無所不通精識博辯俯視一時著有  
慎言雅述及家藏諸集郡北郭舊有勝園讀書草堂在焉  
宋朴潞州人正德丁卯舉人任國子博士古質尙行喜讀書  
爲文宏博詩宗魏晉曾遊四十年清貞淡泊囊無長物

程應登字司晉潞州人幼負異質遊李侍御漳堃門與任光

山陰縣志卷之二十三 三  
祿環相切劘又主陵川宗約教以詩文法弱冠領庚子舉人  
授睢州知州再補延慶州所至嚴請託絕賂遺兩任咸以親  
喪歸里服除乃浩然歎曰向爲親出今可已矣遂不赴補以  
孫正己官贈兵部右侍郎

張鐸字邦敷壺關人嘉靖丙戌進士選庶吉士歷兵部郎中  
湖州府知府夔直豪邁若不可繩以法度然生平大節無一  
不中矩矱其與人接也雖山翁野叟莫不盡歡心及退而叩  
其臆否當其意者無幾人所著有西林稿警心言全唐律詩  
明詩律選湖州府志壺關志若干卷傳世

栗應麟字仁甫潞州人嘉靖己丑進士知河南陳州歷直隸  
順德府同知遷陝西僉事解組歸應麟負才名好吟詠詩詞  
婉麗文亦能成一家以易魁天下宗親例不得爲中朝官游

歷外任以才見忌卒不至大用

栗應宏字道甫應麟弟弱冠舉於鄉累試南宮不第耕讀太行山中高叔嗣解司封歸應宏擔簦相造雞黍定交叔嗣作紫園山人歌贈之云紫園高山概青雲栗家兄弟殊不羣陳州一出驅五馬令弟二十窺三墳陳州者應宏兄應麟也應宏山居詩六卷叔嗣爲之序

沈國華潞安人萬歷丁酉舉人任藍田知縣精明果決聽斷如流公事暇延儒生論文立會文館躬詣會所課之饌具皆出俸資嘗募王摩詰輞川圖勒於石賞鑒家亟稱焉後升甯海知州同時栗端亦博雅嗜古工書精賞鑑以歲貢終

趙銓襄垣人以貢官宣甯王教授學問該博著有獅山集

王之相字鹿谷長子人少有雋才讀書一過不忘崇禎癸未

成進士國變後家居著述有梨花塢詩琅玕集縹笥餘諸書今多散佚

高步蟾字伯仙黎城人以學行著有兩峯文集

以上登安府

蘭以權字世衡汾州人博學能詩洪武中選授中書省照磨以安撫廣西功升禮部員外郎進應天府尹

梁卞介休人洪武間由通經儒士授本縣訓導施教有方尤諳治體辛彥博器之薦擢御史尋卒

霍莘字希伊孝義人永樂丙戌進士奉勅歸里完婚勅獎其積學能文克應舉薦而以德業大成勉之拜監察御史

劉有誠甯鄉人嘉靖丙辰進士聰明穎異幼號神童壯年入仕所至有聲督學關中品題多名士爲人嚴毅耿介著有自警語宦遊二記

趙訥字孟敏孝義人嘉靖己未進士授定興令調江都時權貴欲以其邑稅糧派鄰邑不從內遷刑部主事憂歸服闋補戶部差管徐州倉出羨餘修呂梁洪橋轉郎中擢保甯府知府甫三月乞歸囊橐蕭然束帶無飾金銀者居恆儉約自持不治家人生產嗜讀書寒暑不輟教人以孝友爲先實行副之刻語錄詩文三十卷郡縣舊志皆所續纂年七十九卒門人私謚文直先生

孔天允字汝錫汾陽人嘉靖壬辰一甲二名進士官翰林以宗親外補陝西僉事提督學政降邢州知州遷河南僉事備兵潁州復以布政司參議提督浙江學政歷陝西按察使右布政使遷河南左布政使謝政歸天允好讀書詩文高古晚年寄輿山水園林間與王明甫呂仲和裴庸甫諸人相唱和



所著文谷集若干卷行於世

張冕字服周孝義人嘉靖壬辰進士授戶部主事監收太倉轉員外郎擢河南僉事分巡大梁至洧川因颶風辨野寺之宛人咸異之遷霸州兵備副使平土寇益勵操守及歸行李蕭然居家二十年博極羣書德行文學遠近推重著有勝溪文集併縣舊志

薛東海永甯人嘉靖癸丑進士任滑縣知縣官守剛方居鄉儉素談道嗜學至耄不倦著有四書解醒錄易經解醒錄以上

汾州府

丁伯通甯山衛人成化丁酉魁於鄉官慶陽府推官清苦好學至老不倦著有綱目續編及澤州志

常倫字明卿沁水人正德六年進士除大理寺評事謫壽州

判官遷知甯莞州未上卒年三十有四倫多力善騎射時馳  
馬出郊與侯家子弟俠少年較射間知爲常評事奉大白爲  
壽輕引滿揮鞭馳去中考功法降調坐醫御史罷歸工文章  
善書畫其樂府小詞盛傳澤潞間伎兒優童咸彈絃出口歌  
之好彭老房中術謂神仙可立致從外舅滕洗馬飲大醉衣  
紅腰雙刀馳馬渡河馬顛兒水中影驚蹶刃出於腹潰腸死  
平陽守王濂收葬之並刊常評事集四卷行於世所著別有  
寫清集校心字法諸書

李經陽城人正德甲戌進士爲御史累官陝西副使才敏工  
詩碑碣文多出其手與沁水常倫同時稱山右兩才子

裴騫澤州人正德辛未進士官通政司參議終山東副使學  
博才敏所著有滌陽薊門等集

郭鑿字允新高平人與弟鑿同登嘉靖乙未進士鑿歷副使  
鑿初選庶吉士授檢討遷修撰與纂大明會典歷司經局洗  
馬國子監祭酒終南京工部右侍郎鑿性孝友待人恕而自  
檢嚴口不言人長短若事關官常而分當爲者則俛首自任  
分校會試典試應天稱得人生平手不釋卷詩文自成一家  
類其人有翰林詩稿國學文集家居文集藏於家

粟魁周字汝元陽城人嘉靖己未進士授戶部主事時畿輔  
大祲奉旨賑濟條陳方略全活者衆督運江西清浮糧革宿  
弊人咸德之歷員外郎擢陝西分巡道平巨寇楊師古轉參  
議治隴右以抗直忤直指謝職歸扁戶教子足迹不入公府  
邑故無志網羅舊聞哀集成書事詳辭典稱良史又著有秦

中詩文集

劉庚夔字和宇高平人七歲能文十六魁選十九登隆慶辛未進士官翰林於書無不窺爲文有倚馬之捷與黃葵陽沈蛟門齊名在經筵多敢沃嘗說詩夜如何章反覆發明人主憂勤之念上改容嘉其稱職兩典春闈以官詹學士歸養詔起之疏辭居父喪哀毀不勝卒於苦次年四十有五所著有漆室葵忱宮詹等集

韓仰斗字仲濟沁水人性孝友取與言笑不苟布衣蔬食落  
落寡合與楊沁涓張藐山爲文字交肆力於學博極羣書五  
十喪偶終身不娶雖在暗室寬衣博帶如對大賓聞變移居  
入山日執一卷隨讀隨錄至老不倦

以上澤州府

郭紀大同人正統甲子舉鄉試第一辛未成進士選監察御史累官江西左布政使紀少有雋才釋褐後肆力於詩古文

辭書法琴曲亦皆精妙當世稱爲三絕所著聽鶴軒詩集易解撮要諸書行於世

張應武大同人嘉靖中由貢生授大城縣知縣以仁恕爲治號廉平遷河間府通判益務寬大未幾乞休去應武深經術於易尤邃旣歸後探討不輟後進皆宗之孫爾基進士官終甯紹副使

王濬初字啟哲山陰人文端公家屏子幼耽經史弱冠舉萬曆乙酉鄉試第一旣而屢困公車益肆於學旁搜博採舉凡朝常國典悉皆儲侍遭父喪竭誠盡禮服除授中書舍人一時大制作皆出其手遷戶曹出守粵西以疾乞歸閉戶嘯歌戶外一無所與弟湛初副貢以蔭官中書性耿介不附權貴卒贈太僕少卿

何廷俊大同人父餘師工書善詩賦以選貢官青州府經歷  
廷俊由貢生歷平陽府教授攝臨潼令調項城並有績及歸  
杜門著述中年喪偶不復再娶所著有會約題式四書義神  
授詩義神授書義神授等書人稱爲憑槐先生

左光圖字翼宸應州人天啟辛酉舉人授嵩縣知縣性至孝  
事繼母薄得歡心寇竄河南遣使持僞檄脅之降光圖碎檄  
杖使登陣固守閱數月旁邑得陷城遂破光圖投水中不死  
爲賊所得感其孝釋之母尋沒問道奉柩歸貧甚屢日不火  
食親知餽遺胥不受未終喪卒素好學工詩著有知非集學  
步吟

宗民牧山陰人博洽羣書天文地理醫卜之術無不通曉尤  
於詩備諸家之體以選貢官永壽縣丞旋謝歸耕讀終其身

以上大  
同府

武文馬邑人正德戊辰進士歷韓城旌德知縣博學能文操  
行甚高嘗創輯縣志

相俊字世英朔州人明習禮儀博通經史凡天文地理兵家  
術數之書無不披閱著名當世

蕭廣字惟力朔州人好學工詩聲譽藉甚

以上朔  
平府

閻壘壽陽人成化甲辰進士由戶部主事官至潁州兵備副  
使守正不阿爲劉瑾所陷瑾誅廷臣交薦不起卒於家性嗜  
學於喬白巖王虎谷王晉溪諸人齊名

袁萬里壽陽人嘉靖壬午舉於鄉少穎異讀書日記數千言  
鄉薦後入太學所交盡天下知名士歸益閉戶研究經史嘗  
悼古禮樂及康節數學不傳欲取朱子儀禮通解蔡元定律

呂新書邵子皇極經世纂爲一書未成遂卒年甫三十一所著律呂增註黃鐘積算圖藏於家

郭紘平定人嘉靖戊戌進士累官戶部員外郎生有異質四歲時有偶示以字者卽識之不忘讀書窮極理要工書法尤長於詩及官計曹與薦紳先生上下其議論衆皆斂手推服當世文章鉅公如許松皋喬白巖咸忘分下交與爲唱和喬嘗以文似左氏詞類屈平稱之以上平定州

傅新德字明甫定襄人舉萬曆戊子鄉試第一明年成進士選庶吉士授檢討充乙未會試同考官遷南京國子監司業著誠助淺言示諸生進中允以外艱歸服除補原官旋典江南鄉試累官至太常寺卿管國子監祭酒事模範嚴科條詳密沐其教者皆奮起爲時聞人以病乞休未允卒於官生



平爲學一本宋儒管手錄性理諸書潛心玩索言動取與無

或苟贈禮部右侍郎謚文恪

以上  
析州

劉寅字拱辰崞縣人供武辛亥進士幼敏嗜讀書承父處士  
菊齋教益該博尤精兵家言初官兵部主事洊歷兵部侍郎  
管著武經直解諸書

王鑰代州人天順己卯舉人授開封府訓導期年解組歸教  
授邵中明經之士多出其門晚年益工詩好游覽足跡徧境

內所著有雁門勝跡稿

以上  
代州

苗朝陽字應葵河曲人萬厯丁丑進士授新蔡知縣調杞縣  
雪冤獄裁冗賦以最擢兵科右給事中改左遷禮科都給事  
中尋侍經筵抗疏請立太子又請名儒王守仁陳獻章從祀  
孔廟在諫垣八年遷太僕寺少卿改順天府府丞乞養歸家

居三十餘年益肆力於學前後七薦皆不起嘗有元白草家訓存笥諸書

王邵字炳黎保德人崇禎辛未進士出倪文忠元璐之門選入翰林與黃石齋文鐵菴輩友善以名節相砥礪尋授檢討侍經筵前後拜疏數千言時奉召對知無不言言無不盡上爲動容而後代郎皆經鄉里禦寇救荒多資其擘畫州人咸德之引疾歸旋以司業召不赴嘗有二彌存稿十卷以上係德州郭極字仲樞夏縣人永樂十四年以儒士召授五經博士固辭不受幼與王翰相友善師浚儀歸陽有集燬於火子確字鑿石玉立魁梧以賢良薦亦稱疾不起

呂子固字孟堅解州人宏治己酉舉於鄉授富平教諭研精性理喜著作據師席以禮法自持誘掖獎勸備盡其術解組

後益以講學爲事遠近多從之所著有三車一覽集子鳴韶  
官元氏教諭甘貧樂道以孝友著嘗佐馬谿田修陝西志  
馬巒字子端夏縣諸生騷仲子好學筋躬勵行縣令鍾恕欲  
黜柳子厚鄉賢祠祀巒諫止嗣遺家難吟誦詩書手不釋卷  
旣雪父冤入太學時貴戚擬言復九廟巒上書止之江部耶  
冕將言平陽諸處邊儲改本色巒移書備論道險運艱以寢  
其議及夏相言召還內閣欲仍復九廟以御史徐祚先方知  
夏縣託巒轉達巒遙言謝免其持正不苟同皆類此所著有  
溫公年譜行於世希迂尙論朔道編素書迂書億解瑤京堯  
都寓稿迎暉書屋稿諸書百餘卷藏於家

杜可久解州人隆慶庚午舉於鄉品節高邁工詩文嘗送人  
北上云見說容城爲便道憑君寄淚到椒山風節可見矣曹

予亦亦有詩懷之

裴章美字中含一謙仲子幼承家學書一過卽能洞曉凡典籍中有關於人倫理學者札記之釋以已意名閱古隨筆晝夜持玩事而行之舉萬歷戊午鄉試與辛全訂交相與討論學益進甲戌謝選授永清知縣清衙役革行戶平詞訟興學勸農旌善懲惡力行保甲申明鄉約朔望講讀六言勸諭教化大行以疾乞歸士民泣涕攀留出境不絕家居正己淑人一時學者翕然宗之晉撫吳牲朱之馮前後造廬極契重焉所著有過庭訓燈下靜談三約鞭鈍篇艾言諸書以上解州賈正儀聞喜人文學賸富洪武間舉秀才授河南道御史有直聲累官河南參政清介自持謝政歸紡績爲生太祖聞而獎之

楊時字景瑞河津人宣德癸卯舉人謹愨工詩薛文清公雅重之

史英字廷珍稷山人讀書得體要爲諸生卽以薛文清自期成化戊戌成進士知棗強縣革奸弊清盜賊墾荒賑饑流民復業捐俸完婚葬者千餘人擢監察御史清理長淮鹽課按蘇松劾周駙馬兄貪橫寘於法入掌河南道再按徽甯以剛直忤劉瑾調河南副使不赴箸就正一德諸稿所言皆主敬窮理之學

任佐稷山人正德丙午舉於鄉歷洛南教諭國子學正遷南京戶部主事監江陰倉糧督鈔淮安力革夙弊累擢貴州副使苗民倡亂定策討平之終遼東苑馬寺卿佐純篤嗜學居鄉多行義縣歲代輸文水均徭銀二千餘金佐以學博憂居

深念民累及起復入都力言於總憲張乞題減人尤德之著  
有四書辨異書窗翼言分野詩集

李汝寬字嚴夫開喜人嘉靖丙辰進士授清豐知縣政尙嚴  
明而行以寬大有繼母素以愚著一日詣縣庭愬其子汝寬  
以情法論戒之卒感悟母子相愛擢大理評事以平反著解  
組歸購書數百卷築樓藏之日坐其中吟披不釋著有在澗  
集

梁格字君正稷山人嘉靖乙未進士授濟陽知縣地煩劇號  
難治到官罷苛稅戢奸瑞凡有關民利害者毅然行之久之  
民皆樂業詔爲之稀嘗奉檄勘禹城疑獄徑釋之其人持百  
金來謝亟麾去清苦之操數年如一日嘗作雪糧吟以見志  
擢南京兵科給事中途得母訃擗踊泣血遂避疾踰年卒

所著窺易集四書古義補定齋存稿藏於家

梁紀字理夫格子少承家學淹貫經史居父喪廬墓三年領鄉薦以母老不仕日事著述後迫母命勉與計偕夢母疾卽亟返事間賜秩都察院都事嘗買姚村腴田若干畝斥以爲民居民爲立祠祀之著有楞櫟子等書十四種

梁綱字正夫紀弟也嘉靖壬子解元壬戌成進士授戶部主事筦天津易州倉督密雲餉搜括頻年乾沒及羨餘三千餘金悉以上聞擢河南副使條上利病數十事大吏嘉之下所屬共遵守遷湖廣參政請歸與兄紀侍母不復出綱喜臨池屬榜碑版照映汾晉築知止軒讀書其中前後薦章二十餘上俱不赴所著高粱生集計十三種弟維字持夫從受學於書無所不讀亦工書法子史多手鈔成編所著詩文曰三桂

堂集戊午鄉薦文學與伯仲齊名時以擬河東三風云

裴邦奇字巢雲聞喜人問學綜博不事舉子業以詩名與汾陽孔文谷天允及謝山人榛唱和有巢雲詩集四卷

趙用光字哲臣河津人萬厯乙未進士官至詹事府少詹兼侍讀學士性孝友居官清介學以致知王敬爲宗典文衡拔才士邱毛伯等所著有蒼雪軒文集河東巡鹽李日宣爲之序

王臣直字聖鄰絳州人萬厯庚子舉於鄉授泗州知州丁內艱起知開州治兵捕盜爲畿南保障公暇集知名士談道賦詩宏獎不遺餘力州人士集其文曰澶淵雜著詩曰夜告亭草工分隸崇禎間書蹟傳入禁中上見之欣賞詔董金吾徵書於任所因賦詩書帛以進有孤葵惟向日寸草自知春之



句亦異數也當家居時值秦寇渡河分守道委練鄉勇人倚為固尤有功桑梓云于太武崇禎庚午舉人

劉有綸字代子河津人舉萬厯壬子鄉試事親至孝兄弟友愛無間言析產盡以讓之學行著一時僑居廣陵講學與教寺當事每造虛請終歲無私謁崇禎中佐江都令登城淮撫朱大典擬薦修實錄因官之堅辭尋選桐鄉知縣未任卒著四書自言明誠續言三忠詩文保甲議鹽法條議麟旨諸書任憲字憲章稷山人苑馬卿佐子慷慨有氣節萬厯年以貢授歙縣訓導謁當事條上興學六款訓迪諸生先以身有兄弟閱牆者引為己恥作詩自責稍遷山陰教諭進大同教授請祀忠臣周尙文郭琬旌孝子趙榮貴及節婦五人以為世勸遷慶府紀善告歸家居嘗與夏縣馬鳳巢書言治河與大

同何士魁書言治兵蓋雖身退不忘圖計云所著有求心錄  
禮注補遺兩齋範略蒙求小補繹古繁言藝林正體禮俗明  
徵諸書兵燹後多散軼不全惟龍鍾草有存者

甯二翰字林垣聞喜人幼與從弟三翰俱負文名稱河東二  
甯篤嗜詩書尤好獎掖人士立社會文評騭不少爽由歲貢  
三中乙榜不仕卒著有四書易經心印等集

韓霖字雨公絳州人長身竦肩音如洪鐘爲文有奇氣書法  
在蘇米間天啟辛酉舉於鄉少從兄遊雲間得接婁東諸老  
旣舉於鄉益嗜遊爲聚書計歷江浙北行齊魯購書數百卷  
歸築樓儲之校勘編摩日事著述嘗學兵法於徐光啟學火  
器於高則聖務爲當世有用之士蔡忠恪公撫晉延入幕府  
佐守太原城陷爲賊所得後脫歸匿迹西山爲土寇所殺所

著守國全書救荒全書祖絳帖考敬臺圖說數十種兵燹之餘存者亦僅矣

譚登仕絳縣人天啟間貢司訓同州遷泰安教諭擢知洛南縣服官清謹性嗜學嘗以大學配河洛圖書文學使太青素嗜奇以眼空千古稱之又著太極圖解四書事天象略道一丸論行世

以上絳州

右明一百一人

又六人附見

毛應字牧達平陽人大定十六年舉孝行特賜進士出身授校書郎入教宮掖歷太常博士同知沁州卒有平水集郭用中字仲正大定七年進士歷浮山簿陝州錄事卒年三十一有寂照居士集應與郝子玉鄭仲康爲之序

補遺金二人

山西通志卷一百五十五